



REPUBLIKA E SHQIPËRISË  
Komisioneri për Mbrojtjen e të Dhënave Personale  
Komisioneri

Nr. 161/6 Prot.

Tiranë, më 11/3/2014

REKOMANDIM

Nr 22, datë 11/03/2014

Mbështetur në ligjin nr. 9887, datë 10.03.2008 "Për Mbrojtjen e të Dhënave Personale" i ndryshuar, Vendimet e Kuvendit të Shqipërisë nr 211, datë 11.09.2008 "Për zgjedhjen e Komisionerit për Mbrojtjen e të Dhënave Personale" dhe nr 225, datë 13.11.2008 "Për miratimin e strukturës organikës dhe kategorizimit të pozicioneve të punës të zyrës së Komisionerit për Mbrojtjen e të Dhënave Personale", pas shqyrtimit të relacionit të Drejtorisë së Hetim-Inspektimit në ngarkim të kontrolluesit "Agjencia Shqiptare e Punësimit" (A.SH.P), Tiranë.

KONSTATOVA

Në zbatim të Urdhrit nr.25 datë 05.02.2014 të Komisionerit për Mbrojtjen e të Dhënave Personale është ushtruar kontrolli administrativ pranë kontrolluesit "Agjencia Shqiptare e Punësimit" (A.SH.P), me objekt: "Zbatimi nga ana e kontrolluesit "Agjencia Shqiptare e Punësimit" i ligjit nr. 9887 datë 10.03.2008 "Për Mbrojtjen e të Dhënave Personale", i ndryshuar, si dhe akteve të miratuara nga Komisioneri, gjatë kryerjes së aktivitetit të tij në fushën e punësimit, shërbimeve, promociioneve, shkollimit, formimit profesional dhe trajnimeve".

Kontrolli administrativ ka filluar kryesisht nga zyra e Komisionerit dhe kontrolluesi është njoftuar paraprakisht për kryerjen e kontrollit. "Agjencia Shqiptare e Punësimit" në kuptim të ligjit nr. 9887 datë 10.03.2008 "Për mbrojtjen e të dhënave personale" i ndryshuar, është kontrollues privat, me aktivitet të tij: ndërmjetësimin në tregun e punës si brenda dhe jashtë vendit; formimin profesional në të gjitha fushat; kurse trajnimesh, kualifikime përkthime etj.

Gjatë ushtrimit të aktivitetit të tij kontrolluesi "Agjencia Shqiptare e Punësimit" mbledh, përpunon dhe ruan të dhëna personale për kategorinë aplikantë/kursantë, përmes plotësimit të CV-ve dhe formularëve të ndryshëm. Të dhënat personale që mblidhen janë: emri, atësia, mbiemri, vendlindja, vendbanimi, adresa, tel, e-mail, foto etj.

Komisioneri për Mbrojtjen e të Dhënave Personale pasi shqyrtoi procesverbalin e kontrollit administrativ dhe provat e administruara vëren se:

1. Kontrolluesi nuk kryen informimin e subjekteve të të dhënave personale, mbi mënyrën e mbledhjes, përpunimit, përhapjes, ruajtjes dhe masave të sigurisë që ai ka marrë për të dhënat personale të tyre.

Për subjektet që plotësojnë formularin e aplikimit të punësimit brenda dhe jashtë vendit, nuk ka një informim të plotë dhe të qartë lidhur me qëllimin, masat e sigurisë që aplikohen nga kontrolluesi, mënyrën e përpunimit, mbledhjes, ruajtjes, shkatërrimit, të drejtës për akses, si dhe korrigjim të të dhënave personale të tyre.

Në marrëveshjen ASHP - Aplikantë nuk ka një informim të plotë dhe të qartë për aplikantët lidhur me masat e sigurisë, qëllimin, mënyrën e përpunimit, mbledhjen, ruajtjen, shkatërrimin, të drejtën për akses, të drejtën për korrigjim të të dhënave personale etj.

Në faqen e tij në internet [info@ashp.al](mailto:info@ashp.al) kontrolluesi nuk ka publikuar "politikat e privatësisë" (paketë rregullash) me qëllim informimin e subjekteve që vizitojnë këtë faqe mbi mënyrat e përpunimit të të dhënave personale, masat e sigurisë, ruajtjen e konfidencialitetit, të drejtat e subjekteve të të dhënave dhe detyrimet e kontrolluesit në kuadër të mbrojtjes së privatësisë.

Në këto raste është shkelur neni 18/1 i ligjit nr. 9887 datë 10.03.2008 "Për mbrojtjen e të dhënave personale" i ndryshuar.

Komisioneri për Mbrojtjen e të Dhënave Personale vlerëson se informimi në kohën e duhur dhe sa më i saktë i subjekteve të të dhënave personale nga kontrolluesit është një detyrim shumë i rëndësishëm në drejtim të respektimit të privatësisë dhe përpunimit në respekt të ligjit i të dhënave personale. Informacioni duhet të jepet i saktë dhe sa më shpejtë që të jetë e mundur. Kur të dhënat mblihen nga aplikantët/kandidatët e interesuar, informacioni mund të jepet në kohën e grumbullimit të të dhënave. Gjithashtu mbledhja, përpunimi dhe ruajtja e të dhënave personale përmes përdorimit të faqeve në internet duhet të kryhen sipas parimit të respektimit dhe garantimit të të drejtave dhe lirive themelore të njeriut dhe në veçanti të drejtës së ruajtjes së jetës private.

2. Kontrolluesi "Agjencia Shqiptare e Punësimit" në rregulloren e brendshme të tij nuk ka të përfshirë rregulla të veçanta të shkruara për ruajtjen dhe konfidencialitetin e të dhënave personale, duke shkelur në këtë rast nenet 27 dhe 28 të ligjit nr. 9887 datë 10.03.2008 "Për mbrojtjen e të dhënave personale" i ndryshuar.

Komisioneri për Mbrojtjen e të Dhënave Personale vlerëson se hartimi i rregulloreve është një pjesë e rëndësishme e masave të sigurisë që në tërësi zbaton kontrolluesi, prandaj është shumë e rëndësishme që ju si kontrollues të hartoni rregullore të veçanta për të përcaktuar rregulla për mbledhjen, përpunimin, ruajtjen dhe sigurinë e të dhënave personale. Në rregullore duhet të përcaktohen nivelet e përdoruesve, të drejtat e tyre, aksesit etj, si dhe rregulla lidhur me konfidencialitetin e të dhënave personale. Përmirësimi dhe plotësimi i rregullave është një siguri më shumë për mbrojtjen e të drejtave dhe lirive të subjekteve të të dhënave, gjatë përpunimit të të dhënave personale që kryeni ju si kontrollues.

Sa më sipër:

Në zbatim të neneve 29, 30 dhe 32 të ligjit nr. 9887, datë 10.03.2008 "Për Mbrojtjen e të Dhënave Personale" i ndryshuar, si dhe nenet 107-109 të K. Pr. Administrative :

## REKOMANDOJ

1. Në zbatim të nenit 18 të ligjit nr. 9887, datë 10.03.2008 "Për Mbrojtjen e të Dhënave Personale" i ndryshuar,

- për subjektet që plotësojnë formularin e aplikimit të punësimit brenda dhe jashtë vendit, të bëhet informimi i subjekteve të të dhënave personale mbi mënyrën e mbledhjes, përpunimit, ruajtjes, të drejtën për akses, të drejtën për korrigjim, përhapjen e të dhënave personale dhe sigurinë e tyre.
- në marrëveshjen ASHP - Aplikantë, të bëhet informimi i subjekteve të të dhënave personale mbi mënyrën e mbledhjes, përpunimit, ruajtjes, të drejtën për akses, të drejtën për korrigjim, përhapjen e të dhënave personale dhe sigurinë e tyre.
- në faqen tuaj në internet [info@ashp.al](mailto:info@ashp.al) të publikohen në një rubrikë të veçantë "politikat e privatësisë" (paketë rregullash), me qëllim informimin e subjekteve të të dhënave personale, si dhe të përfshihen kushtet e kriteret që reflektojnë parimet e përpunimit të ligjshëm dhe të drejtë të të dhënave personale. Disa nga këto parime do t'i gjeni në Opinionin "Mbi Mbrojtjen e të Dhënave Personale në Faqen e Internetit të Kontrolluesve Publik dhe Privat" publikuar në faqen zyrtare të KMDP-së [www.kmdp.al](http://www.kmdp.al).

2. Në zbatim të neneve 27 dhe 28 të ligjit nr. 9887 datë 10.03.2008 "Për Mbrojtjen e të Dhënave Personale" i ndryshuar, të hartohet rregullore e brendshme lidhur me mbledhjen, përpunimin, ruajtjen, sigurinë dhe konfidencialitetin e të dhënave personale. Rregulloren tip mund ta gjeni në faqen zyrtare të Komisionerit [www.kmdp.al](http://www.kmdp.al), si dhe ofrojmë asistencën tonë.

3. Kryerja e këtyre detyrimeve të rëndësishme të realizohet brenda një afati kohor prej 45 (dyzet e pesë) ditësh, nga momenti i marrjes dijeni të këtij Rekomandimi.

4. Për plotësimin e këtyre detyrimeve të njoftohet me shkrim pranë Komisionerit për Mbrojtjen e të Dhënave Personale.

5. Me kalimin e këtij afati në rast mospërbushje të këtyre detyrimeve, Komisioneri vepron sipas nenit 30, pika 2 të ligjit nr. 9887 datë 10.03.2008 "Për Mbrojtjen e të Dhënave Personale" i ndryshuar, sipas të cilit... "Komisioneri në rast shkeljesh serioze të përsëritura ose të qëllimshme të ligjit nga një kontrollues ose përpunues, veçanërisht në rastet e përsëritura të rekomandimeve të tij, vepron sipas nenit 39 të këtij ligji dhe e denoncon publikisht ose e raporton çështjen në Kuvend dhe në Këshillin e Ministrave".

Duke ju falënderuar për bashkëpunimin,

KOMISIONERI

FLORA ÇABEJ (POGAÇE)

